



تدري

تدري وش اللي يذبح القلب بسكات
لا صار من تهواه شخص أناني
وتدري وش اللي ما يعوض اذا فات
لابعت قلب فاض لك بالحناني
وانا لك الله جيت لك أنت بالذات
ومقدم لك قلب ماقد عصاني

حصين عجيب الهاجري



كلام عيونك

مافات خلّه والبقا بطعونك
اللي بصدري تسهرك وتباتك
مارس جنونك يافديت جنونك
الله لا يخلي خافقي مداتك
وان قلت وينك قلت لك ياعونك
آمر وانا كلي تحت مرضاتك
بس انت سولف و إعتبر مفتونك
لو تطلبه حتى عيونه جاتك

عطا الله ممدوح

سولف وفضفض لي وفلّ شجونك
تكفا طلبتك لا يطول سكاتك
ابلع من لسانك كلام عيونك
لبيه ياصوتك ويانظراتك
قدر عليك الحزن يخطف لونك
و أول من أنكر صورتك مرآتك
الدمع خيم في ضفاف جفونك
اضحك قبل لا يذبلن ورداتك
لا تترك الضيقة تهز ركونك
وتسرق عناقيد الفرح بشفاتك
وين الحياة اللي تبل غصونك
وين ابتساماتك وغمازاتك
لا يجرفك ل/اليأس سيل ظنونك
وتحطم آمالك وتخسر ذاتك
تري حياتي باهته من دونك
تعال بعثرني و لم شتاتك
اعزف على عود الحياة لحونك
بدّد تعب عمرك وعش مافاتك
انفض غبار اليأس فوق متونك
وارفع على جسر الأمل راياتك
لدّ النظر فيني وأنا مديونك
و اتركني أسبح دجلتك وفراتك

